



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno CCCCXXXII. ad annum CCCCLI.

Parisiis, 1644

Epistola XLV. Leonis Papae I. Ad Pvlcheriam Avgvstam. Eutychnam haeresim detestatur. Hortatur vt eius opera Eutyches in remotiorem locum detrudatur, inque illius monasterio catholicus abbas ...

urn:nbn:de:hbz:466:1-14584

disse noscuntur, in quibus liberum non habuere iudicium.

Causa designatur prohibens celebrare Concilium.

Ne igitur vel resipiscentium desideria mora longior fatigaret, vel incuriosa facilitas temere aliquos & sine discretionem susciperet, iniunctum est ab apostolica sede directis, ut in consortium suæ deliberationis accito Constantinopolitanæ urbis antistite, & pestilentia contagia non admittantur, & sanitatis remedia non negentur. Quæ industria in omnibus, quæ nequiter gesta sunt, emendandis celerem, iuuante Domino, consequetur effectum, si reparationi pacis ecclesiasticæ opem suam vestra pietas dignetur adiungere: ut vobis in terra regnantibus, & Dei regnum intra vos habere mereamini, & catholicam fidem nulla falsitas violet, nulla hæresis inquietet, nec cuiquam liceat doctrinam euangelicam deserere, & sacerdotali honore gaudere. Synodum vero fieri, ut meminit clementia vestra, etiam ipsi poposcimus. Sed sacerdotes prouinciarum omnium congregari præsentis temporis necessitas nulla ratione permittit: quoniam illæ prouinciæ, de quibus maxime sunt euocandi, inquietante bello, ab ecclesiis suis eos non patiuntur abscedere. Vnde opportuniori tempore, propitiante Domino, cum firmior fuerit restituta securitas, iubeat vestra clementia referuari. De qua re plenius inter cetera apud pietatem vestram poterunt allegare, quos misi. Data * quinto Idus * septimo Iunii, Adelphio viro clarissimo consule.

EPISTOLA XLV.

LEONIS PAPÆ I.

AD PVLCHERIAM AVGVSTAM.

Eutychnam hæresim detestatur. Hortatur ut eius opera Eutyches in remotiorem locum detrudatur, inque illius monasterio catholicus abbas sufficiatur.

Leo episcopus Pulcheriæ Augustæ.

RELIGIOSAM pietatis vestræ sollicitudinem, qua vniuerso mundo, Deo inspirante, consulitis, crebrioribus alloquiis incitare præsumo: ut operum vestrorum

profectum necessaria præfectio subsequatur, ac sicut de statu Constantinopolitanæ ecclesiæ gratulamur, cuius & sacerdos & populus catholicæ puritatis fidem iam tenere cognoscitur, ita etiam aliorum concors nobiscum sit de Verbi incarnatione confessio. Vnde quod facturum me aliis literis indicaueram, Lucentium episcopum & Basilium presbyterum fratres meos dirigere præparavi, qui dispositiones meas, fratris mei Anatolii deuotione sociata, secundum eas, quas acceperunt, regulas exequantur. Sicut enim prædicti episcopi scriptis, & clericorum eius suggestione patefactum est, multa sunt quæ indulgentius sunt curanda, multa quæ iustius coercenda: vt in causâ tantæ perturbationis, nec districtio nimis sit aspera, nec remissio parum cauta, cum aliud satisfaciendis, aliud pertinacibus debeat.

Offertur ergo pietati vestræ digna materia, quæ placitam Domino curam sancti cordis exercent, & præcedentium meritorum coronas etiam de præsentis erroris abolitione multiplicet. Sicut enim Nestoriana impietas, ita & Eutychniana blasphemiam ab omnium est catholicorum eliminanda consortio. Quia tam impium est, consubstantialitatem & consempiternam Patri Filii deitatem, etiam ex vtero Virginis matris partu editam negare corporeo, quam vnâ in Dei Filio, post incarnationis sacramentum, affirmare naturam: vt scilicet aut humanitas eius refutetur, aut deitas; cum vnione vtriusque essentia, nec altera sit in alterutram versa, nec assumpta in assumente finita. Sed & Verbi incommutabilitas, & carnis atque animæ veritas maneant inseparabiliter in vnitate personæ; quod qui, testificante lege, credentibus patriarchis, annuentibus prophetis, prædicante euangelio, docentibus apostolis, & toto mundo confitente, non credunt, extra sacramentum corporis Christi, extra vnitatem sunt nominis Christiani.

Quorum sicut ruinam dolemus, ita perfidiam detestamur. Vt autem circa talium personas sincerum seruetur vbique iudicium, & aliud correctis, & aliud pertinacibus rependatur, vestra pietas nostros, qui ab apostolica sede sunt missi, fouere dignetur: eorumque omnes, quas iniunximus, adiuuet actiones, quo citius ac facilius,

auxiliante Domino, quæ ad vestram gloriam, & ad totius ecclesiæ pacem proficiant, exequantur. De Eutyche autem, totius scandali & prauitatis auctore, hoc clementia vestra præcipiat, vt ab eo loco qui Constantinopolitanæ vrbi nimis vicinus est, longius transferatur: ne frequentioribus solatiis eorum, quos ad impietatem suam traxit, vtatur. Monasterio quoque ipsius, cui perniciose indigneque præfedit, catholicum abbatem iubete præponi, qui illam seruorum Dei congregationem & a prauo dogmate liberare, & institutis veritatis possit imbuere.

Data Idibus Iunii, Adelphio viro clarissimo consule.

EPISTOLA XLVI.

LEONIS PAPÆ I.

AD ANATOLIVM CONSTANTINOPOLITANVM
EPISCOPVM.

De his qui hæreticorum erroribus metu, non voluntate, implicantur, vt per satisfactionem in ecclesia suscipiantur.

Leo episcopus Anatolio episcopo in Domino salutem.

LICET sperem dilectionem tuam ad omne opus bonum esse deuotam, vt tamen efficacior tua possit fieri industria, necessarium & congruum fuit, fratres meos Lucentium episcopum & Basilium presbyterum (vt promissimus) destinare: quibus tua dilectio societur, vt nihil in his, quæ ad vniuersalis ecclesiæ statum pertinent, aut dubie agatur aut segniter: cum residentibus vobis, quibus executionem nostræ dispositionis iniunximus, ea possint agi cuncta moderatione, vt nec beneuolentiæ partes, nec iustitiæ negligantur, sed absque personarum acceptione diuinum in omnibus iudicium cogitetur. Quod vt recta obseruantia valeat custodiri, catholicæ primitus fidei seruetur integritas, vt quia per omnia angusta & ardua via est, quæ ducit ad vitam; neque in sinistram, neque ad dexteram ab eius tramite deuietur. Et quia euangelica & apostolica fides omnes expugnat errores, & ab vno latere Nestorium deiicit, ab alio Eutychen & participes eius elidit, hanc regulam mementote seruandam, vt qui-